

---

OFFERYNNAU STATUDOL CYMRU

---

**2002 Rhif 432 (Cy.55)**

**ADDYSG, CYMRU**

**Rheoliadau Cynigion Trefniadaeth Ysgol gan Gyngor  
Cenedlaethol Cymru dros Addysg a Hyfforddiant 2002**

*Wedi'u gwneud* - - 22 Chwefror 2002

*Yn dod i rym* - - 1 Ebrill 2002

Mae Cynulliad Cenedlaethol Cymru yn gwneud y Rheoliadau canlynol drwy arfer y pwerau a roddwyd i'r Ysgrifennydd Gwladol gan adran 138(7) ac (8) o Ddeddf Safonau a Fframwaith Ysgolion 1998(1) a pharagraff 5 o Atodlen 8 iddi ac sydd bellach wedi'u breinio yn y Cynulliad(2), a thrwy arfer y pwerau a roddwyd iddo gan adran 152(5) a (6) o Ddeddf Dysgu a Medrau 2000(3) a pharagraffau 20(2), 21, 22, 28(2), 29, 30, 39(2), 40, 41, 42(4) a 43(4) o Atodlen 7 iddi.

**Enwi, cychwyn a chymhwyso**

1.—(1) Enw'r Rheoliadau hyn yw Rheoliadau Cynigion Trefniadaeth Ysgol gan Gyngor Cenedlaethol Cymru dros Addysg a Hyfforddiant 2002 a deuant i rym ar 1 Ebrill 2002.

(2) Mae'r Rheoliadau hyn yn gymwys i Gymru.

**Dehongli**

2.—(1) Yn y Rheoliadau hyn—

ystyr “coleg addysg bellach” (“*further education college*”) yw sefydliad o fewn y sector addysg bellach (o fewn ystyr adran 91(3) o Ddeddf Addysg Bellach ac Uwch 1992)(4));

ystyr “y Cyngor” (“*the Council*”) yw Cyngor Cenedlaethol Cymru dros Addysg a Hyfforddiant;

ystyr “cynigion i gau chweched dosbarth” (“*proposals to discontinue a sixth form*”) yw cynigion o'r math a grybwyllir ym mharagraff 20(1) o Atodlen 7;

ystyr “y Cynulliad Cenedlaethol” (“*the National Assembly*”) yw Cynulliad Cenedlaethol Cymru;

---

(1) 1998 p.31.

(2) *Gweler* Gorchymyn Cynulliad Cenedlaethol Cymru (Trosglwyddo Swyddogaethau) 1999 (O.S. 1999/672).

(3) 2000 p.21.

(4) 1992 p.13.

ystyr “datganiad o anghenion addysgol arbennig” (“*statement of special educational needs*”) yw datganiad o anghenion addysgol arbennig a gynhelir o dan Ran IV o Ddeddf Addysg 1996(5);

ystyr “Deddf 1998” (“*the 1998 Act*”) yw Deddf Safonau a Fframwaith Ysgolion 1998;

ystyr “Deddf 2000” (“*the 2000 Act*”) yw Deddf Dysgu a Medrau 2000;

mae i “grŵp oedran perthnasol” yr ystyr a roddir i “*relevant age group*” gan adran 142(1) o Ddeddf 1998;

ystyr “sefydliad 16 i 19 oed” (“*16 to 19 institution*”) yw ysgol a gynhelir—

- (a) sy'n darparu addysg llawn amser sy'n addas i ofynion disgyblion dros oedran ysgol gorfodol, a
- (b) nad yw'n darparu addysg llawn amser sy'n addas i ofynion disgyblion oedran ysgol gorfodol;

ystyr “ysgol arbennig” (“*special school*”) yw ysgol gymunedol arbennig neu ysgol sefydledig arbennig;

ystyr “ysgol prif-ffrwd” (“*mainstream school*”) yw ysgol a gynhelir heblaw ysgol arbennig.

(2) Mae unrhyw gyfeiriad yn y Rheoliadau hyn at Atodlen 7 yn gyfeiriad at Atodlen 7 i Ddeddf 2000.

(3) At ddibenion y Rheoliadau hyn dyddiad cyhoeddi cynigion yw—

- (a) y dyddiad pan fodlonir gofynion rheoliad 4; neu
- (b) pan fodlonir gofynion gwahanol ar ddyddiadau gwahanol, yr olaf o'r dyddiadau hynny.

### **Yr wybodaeth sydd i'w chynnwys mewn cynigion a gyhoeddir**

3.—(1) Mae'r rheoliad hwn yn rhagnodi'r wybodaeth y mae'n rhaid i gynigion a gyhoeddir o dan baragraff 20 neu 28 o Atodlen 7 ei chynnwys at ddibenion paragraffau 20(2) a 28(2) o Atodlen 7.

(2) Rhaid i'r cynigion hynny gynnwys yr wybodaeth a bennir yn Atodlen 1 i'r Rheoliadau hyn.

### **Dull cyhoeddi'r cynigion**

4.—(1) Mae'r rheoliad hwn yn rhagnodi dull cyhoeddi'r cynigion y mae'n ofynnol eu cyhoeddi o dan baragraff 20 neu 28 o Atodlen 7 at ddibenion paragraffau 20(2) a 28(2) o Atodlen 7.

(2) Os ysgol a gynhelir yw'r ysgol, rhaid cyhoeddi cynigion o'r fath—

- (a) drwy eu gosod mewn man amlwg yn yr ardal y mae'r ysgol yn ei gwasanaethu;
- (b) mewn o leiaf un papur newydd sy'n cylchredeg yn yr ardal honno; ac
- (c) drwy eu gosod ym mhrif fynedfa'r ysgol neu wrth ei hymyl neu, os oes mwy nag un brif fynedfa, pob un ohonynt.

(3) Pan fydd ysgol yn ysgol arbennig, rhaid cyhoeddi cynigion o'r fath—

- (a) mewn o leiaf un papur newydd sy'n cylchredeg yn ardal yr awdurdod addysg lleol sy'n cynnal yr ysgol; a
- (b) drwy eu gosod ym mhrif fynedfa'r ysgol neu wrth ei hymyl neu, os oes mwy nag un brif fynedfa, pob un ohonynt.

### **Yr wybodaeth sydd i'w hanfon at y Cynulliad Cenedlaethol**

5.—(1) Mae'r rheoliad hwn yn rhagnodi, at ddibenion paragraffau 21(1)(b) a 29(1)(b) o Atodlen 7, yr wybodaeth y mae'n rhaid i'r Cyngor ei hanfon at y Cynulliad Cenedlaethol.

(2) Rhaid i'r Cyngor anfon at y Cynulliad Cenedlaethol yr wybodaeth a bennir yn Rhan II o Atodlen 2 i'r Rheoliadau hyn, os yw'r ysgol yn ysgol prif-ffrwd, neu Ran III o'r Atodlen honno, os yw'r ysgol yn ysgol arbennig, ynghyd â'r canlynol—

- (a) yr wybodaeth a bennir yn Rhan IV o'r Atodlen honno, os yw'r cynigion yn gynigion i gau chweched dosbarth; neu
- (b) yr wybodaeth a bennir yn Rhan V o'r Atodlen honno, os yw'r cynigion yn gynigion i gau sefydliad 16—19 oed.

(3) Mae Rhan I o Atodlen 2 yn gymwys er mwyn dehongli'r termau a ddefnyddir yn Rhannau II i V o'r Atodlen honno.

### **Cyrff y mae'n rhaid anfon copi o'r cynigion a gyhoeddir atynt — ysgolion arbennig**

6.—(1) Mae'r rheoliad hwn yn rhagnodi, at ddibenion paragraffau 21(2) a 29(2) o Atodlen 7, y cyrff neu'r personau, yn achos ysgol arbennig, y mae'n rhaid i'r Cyngor hefyd anfon copi o'r cynigion a gyhoeddir atynt.

(2) Rhaid i'r Cyngor anfon copi o'r cynigion a gyhoeddir—

- (a) at yr awdurdod addysg lleol sy'n cynnal yr ysgol;
- (b) at bob awdurdod addysg lleol sy'n cynnal datganiad o anghenion addysgol arbennig mewn perthynas â disgybl cofrestredig yn yr ysgol honno;
- (c) at rieni pob disgybl cofrestredig sydd yn yr ysgol;
- (ch) at unrhyw Awdurdod Iechyd sy'n gweithredu dros unrhyw ardal sy'n cynnwys unrhyw ran o ardal yr awdurdod addysg lleol sy'n cynnal neu y cynigir y dylai gynnal yr ysgol; a
- (d) at unrhyw Ymddiriedolaeth Gwasanaeth Iechyd Gwladol sydd â chyfrifoldeb am berchenogaeth neu reolaeth unrhyw ysbyty neu sefydliad arall neu gyfleusterau yn ardal yr awdurdod addysg lleol sy'n cynnal yr ysgol.

### **Gwrthwynebiadau i'r cynigion**

7.—(1) Mae'r rheoliad hwn yn rhagnodi, at ddibenion paragraff 41 o Atodlen 7, y cyfnod pryd y gellir anfon gwrthwynebiadau i'r cynigion at y Cynulliad Cenedlaethol.

(2) Rhaid anfon gwrthwynebiadau at y Cynulliad Cenedlaethol o fewn mis ar ôl dyddiad cyhoeddi'r cynigion.

### **Cymeradwyaethau amodol**

8.—(1) Mae'r rheoliad hwn yn rhagnodi mathau o ddigwyddiadau at ddibenion paragraff 42(4) o Atodlen 7 (sy'n darparu y gall cymeradwyaeth i gynigion fod yn ddarostyngedig i ddigwyddiad penodedig sydd o fath rhagnodedig ac sy'n gorfod digwydd erbyn amser penodedig).

(2) Y mathau o ddigwyddiadau yw unrhyw un o'r digwyddiadau canlynol sy'n ymwneud ag unrhyw ysgol neu ysgol arfaethedig arall y cyhoeddwyd cynigion ynglyn â hi o dan adran 28 neu 31 o Ddeddf 1998—

- (a) rhoi caniatâd cynllunio o dan Ran III o Ddeddf Cynllunio Gwlad a Thref 1990(6);

- (b) caffael tir y mae'r ysgol newydd, ehangiad arfaethedig o safle'r ysgol neu newid arall yn safle'r ysgol i gael eu hadeiladau arno;
- (c) caffael meysydd chwarae sydd i'w darparu ar gyfer yr ysgol;
- (ch) sicrhau unrhyw fynedfa angenrheidiol i dir neu feysydd chwarae y cyfeirir atynt ym mharagraffau (b) ac (c) yn ôl eu trefn yn y paragraff hwn;
- (d) gwneud trafodiad cyllid preifat o fewn ystyr rheoliad 16 o Reoliadau Awdurdodau Lleol (Cyllid Cyfalaf) 1997(7); ac
- (dd) gwneud unrhyw gynllun sy'n ymwneud ag unrhyw elusen sy'n gysylltiedig â'r ysgol neu'r ysgol arfaethedig.

### **Darparu gwybodaeth gan y Cynulliad Cenedlaethol**

9.—(1) Rhaid i'r Cynulliad Cenedlaethol hysbysu'r personau canlynol o bob penderfyniad a wneir o dan baragraff 42(1) neu 43(2) o Atodlen 7—

- (a) y Cyngor;
- (b) yr awdurdod addysg lleol sy'n cynnal yr ysgol;
- (c) os yw'r ysgol yn ysgol arbennig, pob awdurdod addysg lleol sy'n cynnal datganiad o anghenion addysgol arbennig mewn perthynas â disgybl cofrestredig yn yr ysgol;
- (ch) corff llywodraethu'r ysgol y mae'r cynigion yn ymwneud â hi; a
- (d) yn ddarostyngedig i baragraff (3), pob gwrthwynebydd y darparwyd cyfeiriad ar ei gyfer i'r Cynulliad Cenedlaethol.

(2) Pan fydd y Cynulliad Cenedlaethol, yn unol â pharagraff (1), yn hysbysu'r personau y cyfeirir atynt yn y paragraff hwnnw o benderfyniad rhaid iddynt eu hysbysu hefyd o'r rhesymau dros y penderfyniad hwnnw.

(3) Os bydd gwrthwynebiadau i gynnig ar ffurf deiseb (sef dogfen sy'n cynnwys testun un gwrthwynebiad wedi'i llofnodi gan fwy nag un gwrthwynebydd) gall y Cynulliad Cenedlaethol gydymffurfio â pharagraff (1)(d)—

- (a) drwy hysbysu'r person (os oes un) y mae'n ymddangos iddynt ei fod wedi trefnu i'r ddeiseb gael ei hanfon at y Cynulliad Cenedlaethol (os darparwyd cyfeiriad ar gyfer y person hwnnw); neu
- (b) os nad oes person o'r fath (neu os na ddarparwyd cyfeiriad ar gyfer y person hwnnw), drwy hysbysu unrhyw un wrthwynebydd y mae ei enw'n ymddangos ar y ddeiseb.

### **Cynigion a gyhoeddir o dan baragraff 43(4) o Atodlen 7**

10. Mae Atodlen 3 i'r Rheoliadau hyn yn effeithiol mewn perthynas â chynigion o dan baragraff 43(4) o Atodlen 7 (cynigion a gafodd eu cyhoeddi a'u cymeradwyo'n flaenorol o dan Atodlen 7 nad ydynt i'w gweithredu).

### **Newid categori ysgol**

11. Os bydd ysgol, ar ôl i gynigion gael eu cyhoeddi o dan Atodlen 7 ond cyn iddynt gael eu gweithredu, yn newid categori o dan Atodlen 8 i Ddeddf 1998 o ysgol gymunedol neu ysgol gymunedol arbennig rhaid i'r cynigion (i'r graddau nad ydynt wedi cael eu gweithredu) gael eu gweithredu gan yr awdurdod addysg lleol (er gwaethaf paragraff 44 o Atodlen 7).

---

(7) O.S. 1997/319; a ddiwygiwyd gan O.S. 1998/371.

Llofnodwyd ar ran Cynulliad Cenedlaethol Cymru o dan adran 66(1) o Ddeddf Llywodraeth Cymru 1998(8).

26 Chwefror 2002

*D. Elis - Thomas*  
Llywydd y Cynulliad Cenedlaethol

## ATODLEN 1

Rheoliad 3

**YR WYBODAETH SYDD I'W CHYNNWYS MEWN CYNIGION A GYHOEDDIR**

1. Datganiad bod y cynigion yn cael eu cyhoeddi gan y Cyngor.
2. Y dyddiad y bwriedir gweithredu'r cynigion neu, os bwriedir gweithredu'r cynigion fesul cam, y dyddiad y bwriedir gweithredu pob cam.
3. Manylion yr ysgolion neu'r colegau addysg bellach y gall disgyblion sydd yn yr ysgol y bwriedir cau'r ddarpariaeth ar eu cyfer fynychu, gan gynnwys unrhyw drefniadau dros dro.
4. Y trefniadau arfaethedig i gludo'r disgyblion hynny i ysgolion eraill neu golegau addysg bellach.
5. Manylion unrhyw fesurau eraill y bwriedir eu cymryd i gynyddu nifer y lleoedd mewn ysgolion neu golegau addysg bellach sydd ar gael yn sgil y bwriad i gau'r ddarpariaeth.
6. Os cynigion ydynt i gau chweched dosbarth, nifer y disgyblion sydd i'w derbyn i'r ysgol ym mhob grŵp oedran perthnasol yn y flwyddyn ysgol gyntaf y mae'r cynigion wedi'u gweithredu neu, os bwriedir gweithredu'r cynigion fesul cam, nifer y disgyblion sydd i'w derbyn i'r ysgol yn y flwyddyn ysgol gyntaf y mae pob cam wedi'u gweithredu.
7. Os cynigion ydynt i gau chweched dosbarth—
  - (a) mewn ysgol gymunedol neu ysgol gymunedol arbennig, datganiad mai dyletswydd ar yr awdurdod addysg lleol yw'r ddyletswydd i weithredu'r cynigion,
  - (b) mewn ysgol wirfoddol, ysgol sefydledig neu ysgol sefydledig arbennig, datganiad mai dyletswydd ar y corff llywodraethu yw'r ddyletswydd i weithredu'r cynigion.
8. Os cynigion ydynt i gau—
  - (a) sefydliad 16—19 oed sy'n ysgol gymunedol neu'n ysgol gymunedol arbennig, datganiad mai dyletswydd ar yr awdurdod addysg lleol yw'r ddyletswydd i weithredu'r cynigion,
  - (b) sefydliad 16—19 oed sy'n ysgol wirfoddol neu'n ysgol sefydledig, datganiad mai dyletswydd wedi'i rhannu gan y corff llywodraethu a'r awdurdod addysg lleol yw'r ddyletswydd i weithredu'r cynigion.
9. Datganiad yn esbonio effaith paragraff 41 o Atodlen 7 a rheoliad 7 gan gynnwys y dyddiad erbyn pryd y mae'n rhaid anfon gwrthwynebiadau at y Cynulliad Cenedlaethol.
10. Cyfeiriad y Cynulliad Cenedlaethol y mae'n rhaid anfon gwrthwynebiadau ato.

## ATODLEN 2

Rheoliad 5

**YR WYBODAETH SYDD I'W HANFON AT Y CYNULLIAD CENEDLAETHOL****RHAN I****DEHONGLI****1.—(1) Yn yr Atodlen hon—**

ystyr “addysg chweched dosbarth” (“*sixth form education*”) yw addysg llawn amser sy'n addas i ofynion disgyblion dros oedran ysgol gorfodol;

ystyr “arholiadau Safon Uwch TAG” (“*GCE ‘A’ level examinations*”) ac “arholiadau Uwch Gyfrannol TAG” (“*GCE ‘AS’ examinations*”) yw arholiadau safon uwch y Dystysgrif Gyffredinol Addysg ac arholiadau uwch gyfrannol y Dystysgrif Gyffredinol Addysg yn ôl eu trefn;

ystyr “y flwyddyn ysgol gyfredol” (“*the current school year*”) yw'r flwyddyn ysgol y cyhoeddir y cynigion ynddi;

ystyr “GNVQ” yw Cymhwyster Galwedigaethol Cenedlaethol Cyffredinol;

ystyr “NVQ” yw Cymhwyster Galwedigaethol Cenedlaethol;

ystyr “y radiws perthnasol” (“*the relevant radius*”) yw radiws o 4.828032 cilomedr (tair milltir);

mae i “rhif safonol perthnasol” yr ystyr a roddir i “*relevant standard number*” gan adran 84(6) o Ddeddf 1998; ac

ystyr “TGAU” (“*GCSE*”) yw Tystysgrif Gyffredinol Addysg Uwchradd.

(2) At ddibenion yr Atodlen hon penderfynir ar faint o le sydd mewn ysgol yn unol ag Atodlen 1 i Reoliadau Addysg (Cynigion Trefniadaeth Ysgol) (Cymru) 1999(9).

## RHAN II

### YR WYBODAETH SYDD I'W HANFON YM MHOB ACHOS PAN FYDD YSGOL YN YSGOL PRIF-FFRWD

2. Amcanion y cynnig.

3. Manylion yr ymgynghori cyn i'r cynigion gael eu cyhoeddi gan gynnwys—

(a) copïau o'r dogfennau ymgynghori; a

(b) barn ac ymatebion y personau yr ymgynghorwyd â hwy.

4. Map yn dangos lleoliad yr ysgol sy'n destun y cynigion a phob ysgol gymunedol, ysgol wirfoddol ac ysgol sefydledig arall o fewn y radiws perthnasol i'r ysgol.

5. Rhestr o bob ysgol uwchradd o fewn y radiws perthnasol i'r ysgol sy'n destun y cynigion, sy'n datgan pa rai o'r ysgolion hynny a gynhelir gan awdurdod addysg lleol gwahanol, ynghyd â'r wybodaeth ganlynol ar gyfer pob ysgol o'r fath am y flwyddyn ysgol gyfredol, ac am y flwyddyn ysgol flaenorol (ac eithrio'r wybodaeth a bennir yn is-baragraff (ch));

(a) y rhif safonol perthnasol ar gyfer pob grŵp oedran perthnasol;

(b) nifer y grwpiau blwyddyn;

(c) faint o le sydd yn yr ysgol; ac

(ch) nifer y disgyblion yn yr ysgol

a rhagolwg o'r materion a bennir yn is-baragraffau (b) i (ch) am bob un o'r pum blwyddyn ysgol sy'n dilyn.

6. Y manylion canlynol addysg chweched dosbarth a ddarperir ar hyn o bryd yn yr ysgol—

(a) cyrsiau sy'n arwain at arholiadau Safon Uwch ac Uwch Gyfrannol TAG,

(b) cyrsiau sy'n arwain at gymwysterau galwedigaethol uwch (GNVQ uwch yn benodol),

(c) cyrsiau eraill, ac

(ch) nifer y disgyblion sy'n mynychu pob un o'r cyrsiau.

*Statws* This is the original version (as it was originally made). Dim ond ar ei ffurf wreiddiol y mae'r eitem hon o ddeddfwriaeth ar gael ar hyn o bryd.

7. Copïau o adroddiadau'r ddau arolygiad o dan Ran I o Ddeddf Arolygiadau Ysgolion 1996(10) y mae Rhan II a III o Atodlen 7 yn gymwys mewn perthynas â'r ysgol o'u plegid.

### **RHAN III**

#### **YR WYBODAETH SYDD I'W HANFON YM MHOB ACHOS PAN FYDD YSGOL YN YSGOL ARBENNIG**

8. Amcanion y cynnig.
9. Manylion yr ymgynghori cyn i'r cynigion gael eu cyhoeddi gan gynnwys—
  - (a) copïau o'r dogfennau ymgynghori; a
  - (b) barn ac ymatebion y personau yr ymgynghorwyd â hwy.
10. Map yn dangos lleoliad yr ysgol sy'n destun y cynigion.
11. Rhestr o'r canlynol—
  - (a) yr holl ysgolion arbennig sy'n darparu addysg ar gyfer disgyblion dros oedran ysgol gorfodol, a
  - (b) yr holl ysgolion eraill a gynhelir gan awdurdod addysg lleol sy'n darparu addysg i ddisgyblion dros oedran ysgol gorfodol y mae darpariaeth ynddynt a gydnabyddir gan yr awdurdod addysg lleol yn un a gedwir ar gyfer plant ag anghenion addysgol arbennig,

yn ardal yr awdurdod addysg lleol sy'n cynnal yr ysgol.

12. Gwybodaeth o ran—
  - (a) nifer y disgyblion dros oedran ysgol gorfodol ym mhob ysgol y cyfeirir ati ym mharagraff 11(a), a
  - (b) nifer y disgyblion dros oedran ysgol gorfodol ym mhob ysgol y cyfeirir ati ym mharagraff 11(b) y gwneir y ddarpariaeth y cyfeirir ati yn yr is-baragraff hwnnw ar eu cyfer,

yn y flwyddyn ysgol gyfredol a rhagolwg o'r nifer hwnnw am bob un o'r pum blwyddyn ysgol sy'n dilyn.

13. Gwybodaeth o ran nifer y disgyblion dros oedran ysgol gorfodol ag anghenion addysgol arbennig o bob un o'r mathau y mae'r awdurdod addysg lleol yn cynnal datganiad o anghenion addysgol arbennig yn y flwyddyn ysgol gyfredol ar eu cyfer ynghyd â rhagolwg o'r niferoedd hynny am bob un o'r pum blwyddyn ysgol sy'n dilyn.

14. Copïau o adroddiadau'r ddau arolygiad o dan Ran I o Ddeddf Arolygiadau Ysgolion 1996 y mae Rhan II a III o Atodlen 7 yn gymwys mewn perthynas â'r ysgol o'u plegid.

### **RHAN IV**

#### **YR WYBODAETH YCHWANEGOL SYDD I'W HANFON PAN FYDD Y CYNIGION YN GYNIGION I GAU CHWECHEG DOSBARTH**

15. Os ysgol prif-ffrwd yw'r ysgol, yr wybodaeth ganlynol sy'n ymwneud â'r ysgol am y flwyddyn ysgol gyfredol a'r flwyddyn ysgol flaenorol (ac eithrio'r wybodaeth a bennir ym mharagraff (c)),—
  - (a) nifer y grwpiau blwyddyn,
  - (b) faint o le sydd yn yr ysgol, ac

---

(10) 1996 p.57.

(c) nifer y disgyblion sydd yn yr ysgol,

a rhagolwg o'r materion hynny ym mhob un o'r pum blwyddyn ysgol sy'n dilyn gan ragdybio bod y cynigion yn cael eu cymeradwyo.

**16.** Os ysgol arbennig yw'r ysgol, yr wybodaeth ganlynol sy'n ymwneud â'r ysgol am y flwyddyn ysgol gyfredol a'r pedair blwyddyn ysgol flaenorol—

(a) nifer y disgyblion yn yr ysgol,

(b) nifer y disgyblion ym mhob grŵp oedran ac o bob rhyw, ac

(c) nifer y disgyblion â phob un o'r mathau o anghenion addysgol arbennig y mae darpariaeth yn cael ei gwneud ar eu cyfer yn yr ysgol,

a rhagolwg o'r niferoedd hynny am bob un o'r pum blwyddyn ysgol sy'n dilyn gan ragdybio bod y cynigion yn cael eu cymeradwyo.

**17.** Pan fydd y cynigion yn ymwneud ag ysgol wirfoddol, datganiad a fydd, o ganlyniad i'r cynigion, angen mwyach am y tir a'r adeiladau a ddefnyddir at ddibenion yr ysgol ac os na fydd angen—

(a) datganiad a yw'r tir a'r adeiladau hynny i'w gwerthu, ac os felly, amcangyfrif o arenillion y gwerthiant, a

(b) os nad yw'r tir a'r adeiladau i'w gwerthu, datganiad ar ddefnydd arfaethedig y tir a'r adeiladau,

os trefnwyd bod yr wybodaeth honno ar gael i'r Cyngor.

**18.** Manylion nifer y disgyblion dros oedran ysgol gorfodol ym mhob grŵp blwyddyn sy'n aros yn yr ysgol sy'n destun cynigion yn y ddwy flynedd cyn y flwyddyn ysgol gyfredol.

**19.** Manylion nifer y disgyblion dros oedran ysgol gorfodol ym mhob grŵp oedran sydd wedi trosglwyddo o'r ysgol sy'n destun y cynigion i sefydliad arall sy'n darparu addysg llawn amser neu ran-amser yn ystod y cyfnod y cyfeirir ato ym mharagraff 18.

**20.** Manylion y sefydliadau y trosglwyddodd y disgyblion y cyfeirir atynt ym mharagraff 19 iddynt gan ddangos faint o ddisgyblion a aeth i bob sefydliad felly.

**21.** Nifer y disgyblion y cyfeirir atynt ym mharagraffau 18 a 19 ym mhob grŵp blwyddyn fel cyfran o gyfanswm y disgyblion yn y grŵp blwyddyn hwnnw.

**22.** Manylion yr ysgolion neu'r colegau addysg bellach y bwriedir y gall disgyblion sy'n cael addysg chweched dosbarth ar hyn o bryd drosglwyddo iddynt os cymeradwyir y cynigion, gan gynnwys asesiad o ansawdd y sefydliadau hynny ac o unrhyw drefniadau pontio a fydd yn gymwys.

**23.** Os ysgol prif-ffrwd yw'r ysgol, manylion canlyniadau'r arholiadau canlynol ar gyfer y ddwy flwyddyn ysgol cyn y flwyddyn ysgol gyfredol yn yr ysgol sy'n destun y cynigion ac ym mhob ysgol a gynhelir, pob coleg technoleg dinas, pob coleg dinas ar gyfer technoleg y celfyddydau a phob coleg addysg bellach a enwir yn unol â pharagraff 20—

(a) canlyniadau arholiadau TGAU wedi'u cyfyngu, yn achos ysgolion heblaw'r ysgol sy'n destun y cynigion a cholegau addysg bellach, i ganlyniadau arholiadau TGAU a gymerwyd gan ddisgyblion dros oedran ysgol gorfodol;

(b) canlyniadau arholiadau safon Uwch ac Uwch Gyfrannol TAG, ac

(c) NVQs, GNVQs a chymwysterau galwedigaethol eraill a enillwyd gan ddisgyblion dros oedran ysgol gorfodol.

**24.** Nifer y lleoedd sydd ar gael yn y sefydliadau hynny a enwir yn unol â pharagraff 20 sydd yn ysgolion.

*Statws* This is the original version (as it was originally made). Dim ond ar ei ffurf wreiddiol y mae'r eitem hon o ddeddfwriaeth ar gael ar hyn o bryd.

**25.** Manylion y pellter, wedi'i fesur ar y llwybr byrraf sydd ar gael, rhwng yr ysgol a'r holl sefydliadau a enwir yn unol â pharagraff 20 ynghyd â manylion am y cludiant cyhoeddus sydd ar gael i'r sefydliadau hynny a enwir yn unol â pharagraff 22 (pan nad oes gwybodaeth felly wedi'i chynnwys eisoes mewn unrhyw drefniadau arfaethedig ar gyfer cludiant a gynhwysir mewn cynigion a gyhoeddir yn unol â pharagraff 4 o Atodlen 1).

## RHAN V

### YR WYBODAETH YCHWANEGOL SYDD I'W HANFON PAN FYDD Y CYNIGION YN GYNIGION I GAU SEFYDLIAD 16—19 OED

**26.** Os ysgol prif-ffrwd yw'r ysgol, yr wybodaeth ganlynol sy'n ymwneud â'r ysgol am y flwyddyn ysgol gyfredol a'r flwyddyn ysgol flaenorol (ac eithrio'r wybodaeth a bennir yn is-baragraff (ch)),—

- (a) y rhif safonol perthnasol ar gyfer pob grŵp oedran perthnasol;
- (b) nifer y grwpiau blwyddyn;
- (c) faint o le sydd yn yr ysgol; ac
- (ch) nifer y disgyblion yn yr ysgol.

**27.** Os ysgol arbennig yw'r ysgol, yr wybodaeth ganlynol sy'n ymwneud â'r ysgol ar gyfer y flwyddyn ysgol gyfredol a'r pedair blwyddyn ysgol flaenorol—

- (a) nifer y disgyblion yn yr ysgol;
- (b) nifer y disgyblion ym mhob grŵp oedran ac o bob rhyw; ac
- (c) nifer y disgyblion â phob un o'r mathau o anghenion addysgol arbennig y mae darpariaeth yn cael ei gwneud ar eu cyfer yn yr ysgol.

**28.** Yr wybodaeth ganlynol sy'n ymwneud â'r ystafelloedd yn yr ysgol—

- (a) lleoliad yr ystafelloedd;
- (b) a yw'r ysgol ar safle sengl neu ar safle wedi'i rannu; ac
- (c) manylion yr ystafelloedd cyffredinol ac arbenigol.

**29.** Manylion yr ysgolion a'r colegau addysg bellach y gellid yn rhesymol, ym marn y Cyngor, ddisgwyl i'r disgyblion a fyddai fel arall wedi mynychu'r ysgol allu eu mynychu ar ôl darhod oedran ysgol gorfodol os cymeradwyir y cynigion, gan gynnwys asesiad o ansawdd y sefydliadau hynny ac o unrhyw drefniadau pontio a fydd yn gymwys.

**30.** Os ysgol prif-ffrwd yw'r ysgol, manylion canlyniadau'r arholiadau y cyfeirir atynt yn is-baragraffau (a) i (c) o baragraff 23 am y ddwy flwyddyn ysgol cyn y flwyddyn ysgol gyfredol yn yr ysgol sy'n destun y cynigion ac ym mhob ysgol a gynhelir, pob coleg technoleg dinas, pob coleg dinas ar gyfer technoleg y celfyddydau a phob coleg addysg bellach a enwir yn unol â pharagraff 29.

**31.** Nifer y lleoedd sydd ar gael yn y sefydliadau a enwir yn unol â pharagraff 29 sydd yn ysgolion.

**32.** Manylion y pellter, wedi'i fesur ar y llwybr byrraf sydd ar gael, rhwng yr ysgol a'r holl sefydliadau a bennir ym mharagraff 29 ynghyd â manylion am y cludiant cyhoeddus sydd ar gael i'r sefydliadau hynny (pan nad oes gwybodaeth felly wedi'i chynnwys eisoes mewn unrhyw drefniadau arfaethedig ar gyfer cludiant a gynhwysir mewn cynigion a gyhoeddir yn unol â pharagraff 4 o Atodlen 1).

## ATODLEN 3

Rheoliad 10

### CYNIGION O DAN BARAGRAFF 43(4) O ATODLEN 7

#### 1. Yn yr Atodlen hon—

ystyr “y cynigion gwreiddiol” (“*the original proposals*”) yw'r cynigion a gymeradwywyd o dan Ran III o Atodlen 7 y mae'r cynigion newydd yn ymwneud â hwy; ac

ystyr “y cynigion newydd” (“*the new proposals*”) yw'r cynigion hynny a grybwyllir ym mharagraff 43(4) o Atodlen 7.

#### 2. Rhaid i'r cynigion newydd—

(a) pan fydd yr ysgol yn ysgol prif-ffrwd gael eu cyhoeddi—

(i) drwy gael eu gosod mewn man amlwg yn yr ardal y mae'r ysgol yn ei gwasanaethu;

(ii) mewn o leiaf un papur newydd sy'n cylchredeg yn yr ardal honno; a

(iii) drwy gael eu gosod ym mhrif fynedfa'r ysgol neu wrth ei hymyl, neu os oes mwy nag un brif fynedfa, pob un ohonynt.

(b) pan fydd yr ysgol yn ysgol arbennig gael eu cyhoeddi—

(i) mewn o leiaf un papur newydd sy'n cylchredeg yn ardal yr awdurdod addysg lleol sy'n cynnal yr ysgol; a

(ii) drwy gael eu gosod ym mhrif fynedfa'r ysgol neu wrth ei hymyl, neu os oes mwy nag un brif fynedfa, pob un ohonynt.

#### 3. Rhaid i'r cynigion newydd gynnwys—

(a) yr wybodaeth a gynhwyswyd yn y cynigion gwreiddiol, a

(b) datganiad paham y bwriedir na ddylid gweithredu'r cynigion gwreiddiol

4. Cyn cyhoeddi'r cynigion newydd rhaid i'r Cyngor, gan roi sylw i unrhyw ganllawiau a gyhoeddir gan y Cynulliad Cenedlaethol, ymgynghori â'r personau hynny y maent o'r farn eu bod yn briodol.

#### 5. Rhaid i'r Cyngor anfon—

(a) copi o'r cynigion newydd a gyhoeddwyd;

(b) copi o'r wybodaeth a anfonir at y Cynulliad Cenedlaethol o dan baragraff 21(1)(b) neu 29(1)(b) o Atodlen 7 a rheoliad 5 pan gyhoeddwyd y cynigion gwreiddiol; ac

(c) yr wybodaeth y cyfeirir ati yn rheoliad 5 a fyddai'n gymwys pe bai'r cynigion gwreiddiol wedi'u cyhoeddi pan gyhoeddwyd y cynigion newydd;

at y Cynulliad Cenedlaethol.

6. Pan fydd yr ysgol sy'n destun y cynigion newydd yn ysgol arbennig rhaid i'r Cyngor anfon copi o'r cynigion newydd a gyhoeddwyd at y cyrff neu'r personau yr anfonwyd copi o'r cynigion gwreiddiol atynt o dan baragraffau 21(2) a 29(2) o Atodlen 7 a rheoliad 6.

7. Caiff unrhyw berson anfon gwrthwynebiadau i'r cynigion newydd at y Cynulliad Cenedlaethol o fewn mis ar ôl dyddiad cyhoeddi'r cynigion.

*Statws* This is the original version (as it was originally made). Dim ond ar ei ffurf wreiddiol y mae'r eitem hon o ddeddfwriaeth ar gael ar hyn o bryd.

---

## EXPLANATORY NOTE

*(Nid yw'r nodyn hwn yn rhan o'r Rheoliadau)*

O dan Atodlen 7 i Ddeddf Dysgu a Medrau 2000 caiff Cyngor Cenedlaethol Cymru dros Addysg a Hyfforddiant (“y Cyngor”) gyhoeddi cynigion i newid ysgol a gynhelir fel na fydd mwyach yn darparu addysg chweched dosbarth, neu i gau ysgol a gynhelir sy'n sefydliad 16—19 oed os oes, a siarad yn fras, ddau adroddiad olynol yn datgan bod y chweched dosbarth yn annigonol neu fod ar sefydliad 16—19 oed angen mesurau arbennig neu fod ganddo wendidau arwyddocaol.

Mae'r Atodlen yn nodi gweithdrefnau ar gyfer arfer y pwerau hyn gan y Cyngor. Yn benodol, rhaid i'r Cyngor gyhoeddi cynigion y mae arnynt angen cymeradwyaeth y Cynulliad Cenedlaethol. Nodir y fframwaith ar gyfer y gweithdrefnau hyn yn yr Atodlen, ond mae llawer o'r manylion i'w rhagnodi mewn Rheoliadau a wneir gan y Cynulliad Cenedlaethol. Mae'r Rheoliadau hyn yn rhagnodi'r gweithdrefnau hynny.

Mae *rheoliad 2* yn diffinio'r termau a ddefnyddir yn y Rheoliadau.

Mae *rheoliad 3* gydag *Atodlen 1* yn rhagnodi'r wybodaeth y mae'n rhaid ei chynnwys mewn cynigion a gyhoeddir.

Mae *rheoliad 4* yn rhagnodi'r modd y mae'n rhaid cyhoeddi cynigion.

Mae *rheoliad 5* gydag *Atodlen 2* yn rhagnodi'r wybodaeth ychwanegol y mae'n rhaid ei hanfon at y Cynulliad Cenedlaethol gyda'r cynigion a gyhoeddir.

Mae *rheoliad 6* yn rhagnodi cyrff eraill y mae'n rhaid anfon copi o'r cynigion atynt yn achos ysgolion arbennig.

Mae *rheoliad 7* yn darparu ar gyfer y terfynau amser i wrthwynebu cynigion.

Mae *rheoliad 8* yn rhagnodi'r digwyddiadau y gellir eu pennu yn achos cymeradwyaeth amodol i'r cynigion.

Mae *rheoliad 9* yn ei gwneud yn ofynnol i'r Cynulliad Cenedlaethol roi gwybodaeth am ei benderfyniadau i'r personau a bennir yn y Rheoliad hwnnw.

Mae *rheoliad 10* gydag *Atodlen 3* yn gwneud darpariaeth ar gyfer cynigion gan y Cyngor na ddylid gweithredu cynigion blaenorol y mae'r Cynulliad Cenedlaethol wedi'u cymeradwyo.

Mae *rheoliad 11* yn gwneud darpariaeth arbennig i weithredu cynigion pan fydd ysgol yn newid categori o fod yn ysgol gymunedol neu'n ysgol arbennig gymunedol.